

JUMP-UP ESCOLAR DI SAN NICOLAS A CREA UN UNION NOBO PA E SCHOOLNAN

ORANJESTAD (AAN): Manera por corda, dia 11 di Februari tur e schoolnan di enseñanza avanza a tene nan jump-up na San Nicolas, y esey a marca e prome vez cu nan a organiza esey di nan mes.

En total a participa ocho school cu un total di 903 mucha. Musica a worde suministra door di Dushi Band, Musical Time, y Claudius Philips cui OREO.

E evento ey tabata grandioso como cu e muchanan a jump na nan gusto. E alumnonan di International School of Aruba tambe a bini y participa pa prome vez den un jump-up. Pa nan e tabata algo cu hamas nan lo por lubida, y nan a laga sa cu otro año nan tey atrobe.

Di e otro schoolnan nan a ricibi hopi elogio di e director- y directoranan. Lo mas principal tabata cu e muchanan a jump na nan antoho. E tabata un fiesta pa tur e muchanan di school.

Por a ripara cu tabata tin masha hopi hende riba pia pa mira e Parada di School aki. Ningun momento Polis me-

ster a actua, como cu e publico a comporta nan mes bon.

Na un dado momento Dios a bendiciona e multitud enorme door di basha un tiki awacero riba nan. Ta parce cu despues di esaki e entusiasmo a bira mas grandi, y specialmente den e cayanan di Bernhardstraat y Pastoor Hendrikstraat for di Kong Ming pa San Nicolas Sportpark, loke den pueblo di San Nicolas ta worde yama "last lap" y musica a zona y e caya mes ta invitabo pa jump mas.

Un gratitud ta bay na tur e schoolnan cu a participa, como tambe e directivanan di school, direccion di enseñanza, Polis y e tres bandanan cu a contribui na e gran jump-up exitoso aki.

DIARIO a compronde cu a sali for di e miembranan e idea pa e schoolnan sigui traha hunto, no solamente pa Carnaval pero tambe den direccion educacional, social, deportivo, y recreacional. E comision lo reuni regularmente pa concretiza e plannan.